

《好地地，我做乜鬼無啦啦帶個 港女Friend嚟台灣特訓？》

作者: 趕故書生

Powered by [紙言](#)

【1】出發

「喂？」一把懶洋洋嘅聲線慢慢激起我內心熊熊嘅怒火。

「小姐！依家幾點啊？」我努力壓制住啲火種。

「依家9點咋嘛，急咩喎。」

「你知唔知我哋搭10點45嘅飛機啊？」條友仲要一啲都唔驚嗰下先好嘢.....

「我住東涌，過嚟好快咋嘛，催咩姐！」嗰個Kiki啲態度呢，真係差到呢，點解我當初會應承佢嘍？

話說件事就係咁嘅.....

我本身就係台灣讀書嘅，唉.....嚟得台灣讀書都唔方勁得去邊啦，除咗垃圾，我搵唔到第二個詞嚟形容自己。

咁我中學個班不鏟都係女多男少，意味住你會除咗同男仔fd之餘，都會同女仔fd嘅。

咁班中有啲女仔係好嘅，但當中亦都有港女格，甚至係難相處。

咁Kiki佢係港女啲，但又未至於難相處，有時某啲位係難頂啲，但佢對朋友都好好嘅。

所以就算畢咗業之後，我哋都仲有keep住聯絡。

講下Kiki感情背景先：

Kiki樣貌中上，稍稍化妝可說是女神級別，所以年中追求佢嘅男仔好多。

同時間佢都係成日換畫嗰種人，男朋友一個唔啱，就分手。

有時佢同我講佢啲感情煩惱，已經複雜到我唔知點講好。

被分手就怨天怨地，po曬嘢等全世界知，自己飛人就理所當然咁，咁自己覺得事不關己，咪己不勞心囉。

咁佢都會搵我傾下嘅，啊咁我之前都苦口婆心咁同佢講，同佢分析，曬我唔少口水。

到最後佢都係有自己嗰一套，咁咪由鳩佢囉。

跟住呢，成件事就咁嘅：

佢同最新嗰個男朋友就分咗手，不過今次慘啲，被分手之餘，佢男朋友送咗頂高級帽俾佢戴。

免費㗎，唔洗錢。

咁平時佢都有搵開我傾佢嘅感情事，所以事情發生咗唔係好耐，佢就打電話嚟啦。

「嗚...嗚嗚.....嗚嗚嗚.....。」我一接電話，就聽到陣陣低嗚聲。

當時我仲好開心咁係廳到睇緊愛回家，一睇電話，知道係Kiki打嚟，我就心諗：碌柒啦。

打得嚟都唔方好嘢，唔打嚟反而無嘢，古語亦云：好事唔會自己嚟搵你，你要自己去搵；但正常人係唔會去搵衰嘢，但點解會有衰事呢？就正正係衰嘢會自己搵上門。

死啦，唔記得嗰句嘢係咩添，不過大概係咁嘅意思啦！

「做咩事啊？」我一接到電話，就返咗入房，鎖埋門傾，打開一級戒備信號。

每年暑假都會返香港，但好巧合，佢偏偏係我臨返去台灣前幾日打俾我。

「無.....我同佢分咗手.....」Kiki係電話裡頭嘅低泣聲不曾斷過。

「又分手啊？」我毫不意外，佢幾乎用曬我啲同理心。

「係啊.....佢好衰啊，俾帽我戴！！！」佢開始嚟料啦，所以都係等佢講完先到我講。

「點解佢要俾帽我戴啊.....點解啊！？」Kiki揭斯底里地哭喊著，佢一次過爆曬佢所有情緒出嚟。

「咁唔洗錢就可以睇清楚一個人，知道佢配唔上你，你都好應該明瞭自己要放手啦？」

「但我仲係好鐘意佢.....」KiKi不死心地說。

「你之前都鐘意過其他人啦？你講緊嘅係鐘意.....而唔係愛啲。」我平心靜氣地同佢講，儘管我知道佢想我講嘅並唔係啲啲。

其實Kiki只不過係我想慰藉佢心靈，講一啲佢想聽嘅說話姐。

「今次真係好唔同.....好難受。」佢花好大力氣先講出啲兩隻字。

「咁今次點樣唔同啊？」Kiki令我感到好奇。

究竟係邊個令佢咁難過呢？佢之前都係有難過嘅，但佢之前係打電話嚟鬼哭狼嚎，鳩叫幾鑊咁樣嘍嘛。

依家反而好平靜，不過平靜背後，我感受到佢情緒嘅起伏。佢收埋咗不一樣嘅傷心係心入面。

「今次我對佢好認真，佢就好似一塊磁鐵咁，不斷咁吸我過去，我個心就咁樣俾佢吸走咗。」

「我對佢，有著好多不一樣嘅未來，我亦希望我同佢會一路走落去。」

「啲種感覺就好似返返去初戀咁。」

「你知道嗎？當你拍咗好多次拖，遇過好多次愛情、好多個男人，你要搵返一個擁有初戀感覺嘅愛情……真係好難。」

「就算你幾愛嗰個男仔都好，依家佢變心，你再愛都唔會有用。」我老實咁同佢講。

「所以我好想搵個好男仔啊！！！！好想變得更加好。」

唉，Kiki同我嘅感情觀真係差好遠，如果我好似Kiki咁，我會劫鬼死囉。

「係嗎！你過幾日係咪返台灣啊？」Kiki忽熱間由消沈嘅聲線轉為熱情。

「係啊，做咩啊？」我有種不詳嘅預感。

「我可唔可以過去搵你啊？」佢溫柔地說。

「你係咪又諗到啲咩奇奇怪怪嘅嘢啊？」我試探地問道。

「我頭先係到諗啊，啲台妹又識絞又識爹人，簡直可以將男人玩弄係掌心之中。」Kiki講到頭頭是道咁。

「我想去學嘢，去學做一個女人，順便睇下有無好仔！嘻嘻。」

「你講真㗎？」我半信半疑地問道。

「你當我流㗎！？痴線。」

咁突然？

「下？我係去讀書，要上堂嗎姐姐。」我好怕佢嚟真，佢痴起上嚟可以好痴線。

「你唔洗理我㗎，我可以自己一個出去㗎！無問題㗎。」佢講到咁樣，我一時之間都諗唔到咩嘢嚟反駁佢。

「但你機票又未買，入台證又未搞……」

「我今晚即刻買機票，聽日搞一搞個入台證，後日可以出發添。」Kiki好似下定決心咁，搞到我都唔知點做好。

「下？」我求其俾啲反應佢先，再思考下跟住落嚟應該點。

「你唔想我過去咩？」Kiki一句打沈咗我。

「唔係……」

「只係怕你一時衝動咁過嚟會後悔姐。」嗰個反應已經盡咗我腦入面嘅極限啦。

「到時後悔咪買返張機票返嚟囉，有幾閒姐？」

「咁你唔洗返學咩？」

「我Ive畢業好耐啦，依家都未搵到工，當去玩下都好姐。」

我屌！係嗎，我都唔記得咗有嘢一回事。

就係咁，Kiki就諗住嚟台灣進行特訓啦。咁唔通佢有錢我唔俾佢嚟咩？

估唔到佢連坐飛機都可以遲到姐，仲要施施然咁行過嚟，我真係睇在一場朋友份上，無當場扯火咋。

「下次早啲啦。」我洗盡千方百計先拖住櫃枱，叫佢唔好攔住個行李通道。

「好對唔住！」我死死氣咁認錯，最後搞到原本幾好態嘅櫃枱小姐唔好老牌。

我睇咗Kiki一眼，佢仲毫無悔改之心，真係嬲到我啊。

「下次我唔會再等你！」我老實不客氣。

「好啦，對唔住啦。」係要人嬲先安落。

嗰件事我就當算數，我唔想咁小氣成日記住記住。

不過Kiki個行李都幾重下，睇嚟帶咗唔少嘢，佢手上仲拎住唔少嘢。

「你帶咁多嘢，你諗住去幾耐啊？」我以為佢係去短短十幾日到，但我依家見到咁多嘢，睇怕唔止十幾日嗎.....

「張證可以俾我留幾耐咪幾耐囉！」Kiki理直氣壯地說，眼神沒有絲毫懷疑，佢嗰份自信係點樣嚟㗎？

「好啦，你鐘意啦！」反正我都係自己一個人住，我又無咩所謂。

我哋好快就到咗台中，一落機場，即刻同佢買悠遊卡同埋電話卡。

「你們想要預付卡嗎？」櫃枱小姐用佢無比溫柔嘅聲線問我。

「嗯...你等我一下喔。」我拉住Kiki去遠少少嘅地方，用返廣東話同佢講。

「咁你想唔想係度買啊？」我問Kiki。

「咩係預付卡啊？」

雖說台灣好近，但其實兩地文化、語言上都有差異，你唔係長期係度生活，唔清楚都好正常。

「姐係儲值卡。」我見慣不怪。

「咁我買唔買好呢?!」Kiki漠不經心地道。

我真係.....又再次俾佢吹到脾一聲。

「係我問你買唔買啲小姐，你依家問我返轉頭都得嘅？」

「咁人哋真係唔知買唔買好啊嘛.....」Kiki扮可憐嚟搏男仔心軟。

如果個男仔係對佢有意思嘅話，我諗啲招好有用，但可惜啊，我唔係。

「你買咗預付卡，你可以去7-11增值，如果唔係你用咩上網啊？」

「仲有啊，我覺得台灣啲網速快過香港。」

「好啦，咁我買啦！」

「咁你自己同人講啦。」我叫佢用普通話同服務員講。

「下?我唔識講啲，你幫我講啦。」有乜嘢好湊啊?

聽到啲句，我真係再也頂唔住了。

我捉住Kiki，行埋一邊，鄭重咁同佢講。

「我同你講，你嚟嗰度係學點樣獨立!咩都要靠男人，咩都俾男人食住，仲得了嘅?」我好認真咁同佢講，我諗今次真係咁耐以嚟，第一次咁認真同佢講。

佢愕然，嘴巴一開一合咁，似乎有嘢想講又講唔出口咁。

委屈。

「自己去問啦，你自己唔學下普通話，你想溝台仔都溝唔到啦。」

事實證明，換個心態係唔同啲，心境都唔同啲。

你睇下，睇下條八婆!即刻幾撚有動力啊。

【2】到步

我哋搞掂曬啲嘢，跟住就搭車去我住嗰個地方，我係學校附近嘅地方租咗間房住，因為抽宿舍好難抽，好多人都直接搬出嚟住。

一路上，Kiki就不停玩手機，係咁影ig story。

其實我都知嘅，佢story唔係俾其他人睇，而係俾嗰一個令佢上心嘅男仔睇。

Po完無耐，Kiki好似無咩興奮嘅心情，反而雙眸無神。

「做咩事啊？佢無睇到你story？」我猜測，不過我覺得自己9成估中㗎啦。

「係啊，成分鐘都無睇到。」Kiki好是失望。

「明明佢之前係我po完一分鐘之內一定會睇㗎嘛！」Kiki佢病得好誇張。

我正想解答佢個問題，但架的士已經到咗。

事關我住嗰度距離機場只不過係我短短5分鐘嘅車程。

「落車先，今晚再傾啦，一陣仲有排執啊啲嘢，無咁多時間俾你係度傷春悲秋。」

雖然我對佢好惡死，但我真係為佢好，我依家諗返起，如果中學嗰陣有人狠狠咁樣鬧醒我，我諗我唔會浪費咁多時間。

Kiki拖住沈重嘅行李，心情都係一樣咁沈重。

我幫手拎佢個行李上去，台灣啲樓唔似得香港咁高，所以有啲係無電梯㗎，咁啱我嗰度就要行樓梯，唯有認命。

我住3樓，高就唔係好高，但抬啲行李上去都幾攞命。

我搬完自己啲行李上去仲要幫埋Kiki搬，全部搬曬上去之後，我已經出撚曬汗，自己又唔係做開運動，瘦骨嶙峋咁款，成個人散曬。

「哇！你住喱度都幾大㗎！」

「OK啦，台中租地方住都幾大，又平㗎。」

「仲要雙人床，正啊！」Kiki毫不客氣咁坐咗落去，「你間房好整齊㗎。」

「我男人老狗一個，可以有啲咩啊？」係佢同閒聊期間，我已經開始整理緊啲嘢，因為經驗話我俾知，如果依家唔整，今晚唔洗馴都似。

搬完嘢，拉住疲倦嘅軀殼係度執嘢。

「你嚟台灣兩年都無女朋友？」Kiki好奇地問我一下。

「係哩度生活咁正，有返個女朋友就真係美滿啦。」Kiki感慨地說，正正說中了我心聲。

「鬼唔知咩？我夠想啦，有先得㗎。」我有啲髒，同時都有無奈。

髒，係因為俾佢講中，自己又無面；無奈，係因為佢講嘅係事實。

「咁姐係你有鐘意嘅人啦？」

「係啊。」我燥燥地，我開始留意到，條友仔好似咩都無做，坐係張床度.....

「話俾我知啦，台灣人定香港人？好似都無咩點聽過你的啲感情事咁。」

我知道佢係一番好意，但我執緊嘢真係無咁嘅心情係度講愛情經。

「執完嘢同你講啦，你都執下嘢啦。」

「唔想執啊.....聽日先啦！」啊，條友真係懶得就懶。

之前同隔離班啲男仔fd去旅行真係無乜嘢，男仔通常都無乜所謂，大家都好識做。

喱次算係第一次同女仔去「旅行」，嗰啲不為人知嘅一面開始好似雞蛋殼咁，一敲就開始慢慢碎落。

「我唔會幫你執㗎，你自己搞掂啦。」既然你都老實不客氣，咁我都唔客氣啦！

「得啦。」Kiki冷冷地回我一句之後，繼續坐係張床度，問題係.....張床都未鋪床單。

「晏啲你想食咩啊？」因為依家都差唔多中午啦，食完再返嚟執。

「我想食夜市啊！」有時真係唔知應該話佢可愛定無腦好.....

「呀大姐，知唔知咩叫『夜市』啊？」

「咪掃街囉！」

「你無嚟過台灣？」我不禁開始察覺到，嚟緊啲日子慢慢恐怖了。

「有啊，我都有掃過街啊。」

「街市淨係夜晚開㗎咋，講到明夜市，夜~~市啊！」

「哦，原來係咁！」謝天謝地啊，佢終於開始醒覺啦。

「咁我哋食咩啊？」佢甜笑地同我講，那抹天真爛漫嘅笑容，真係無任何雜質，純到不行。

「我頭先就係問你食咩，你依家問返我轉頭，真係.....叻！」

「算啦，我哋出去睇下有咩食先啦。」

基本上，香港同台灣嘅飲食文化好唔同，香港真係周街好嘢食。雖然台灣都好多，但相對上選擇好少，而且重複性都好大。

簡單嚟講，係嗰度搵唔到咩好嘢食，我指.....學校附近，要去食好嘢，要用半個鐘至一個鐘出市區。

「行啦？」Kiki仲玩緊手機。

「係啊，車你去搵嘢食。」我自以為型咁轉下個鎖匙，點知轉轉下條鎖匙跌佐落地下。

嗰個時候梗係若無其事咁彎低身執返上嚟，再問句嘢分散佢嘅注意力。

「行未啊你？」

【3】到步II

「行啦！」嗰條咁嘅軟皮蛇，真係踢佢先會郁。

Kiki求其踢對拖鞋，露出條長而白滑嘅美腿，我真係第一次同個女仔係同一個空間入面。

我覺得自己會係忍唔住嗰一方。

我落樓下開定架機車，然後等Kiki落嚟上車。

又要等，等成5分鐘先落嚟，但奇怪嘅係佢個look無咩點變到喎，究竟佢嗰5分鐘做咗啲咩呢？無人知道嗰個祕密。

「哇！估唔到你冇車喎。」Kiki投以欣羨嘅目光，雖然無咩值得自豪，但心入而係爽嘅，呃唔到自己。

「好平常姐有摩托車，又唔係有私家車。」

「摩托車洗唔洗牌㗎？」基本上我提親自己有架摩托車，個個香港fd都問洗唔洗牌，好似係佢哋心目中，係台灣揸摩托車好似揸電動車咁，因為電動車係唔洗牌。

「梗係要啦，但考好簡單咋嘛，通街都係。」

「我有啲驚喎.....」Kiki抖顫地說。

「唔洗驚，信我啦，都揸咗咁耐。」我鼓勵下佢，因為台中係有摩托車比較方便。

Kiki好似安心咗啲，跟住佢慢慢捉住我膊頭，一嘢跨咗上嚟。

「得未啊？」我柔聲問道。

「得啦。」Kiki努力抑壓自己，見到佢咁驚，我有股莫名嘅興奮感。

唔知係咪男仔嘅天性，係鐘意恰下啲女仔。

我一推油門，嗰一下衝咗出去，Kiki係後面坐唔穩，用力咁捉實我條腰。

「哇！」跟住尖叫咗一聲。

「做咩啊？」跟住我又急煞車。

本來向後仰嘅Kiki因為我嘅急煞，然後成個人向前傾，佢嘅重心俾我食曬，包括波餅。

儘管Kiki唔係好大，目測有大B細C，但通常男人嘅目測並唔係咁準。

「哇！」佢又再尖叫多次。

我坐係前面，可以清楚感受到Kiki個波壓落嚟，嗰種成個壓落嚟嘅感覺係不同於你偷偷地掂人咁個波邊。

嗰一下係更有成功感，各位女士不妨多啲試下。

我唔會將嗰種興奮喜形於色，我粗聲粗聲地問佢：「搞咩啊？」

「我第一次坐，好驚啊！」

「驚個鬼咩？坐坐下就唔驚㗎啦。」

「我可唔可以攞住你條腰啊？」Kiki係咪驚到盡頭，反而變得無所畏懼？

「是但你啦。」

然後我感覺到Kiki真係一手攞落嚟，我從後背深深感受到Kiki嘅秀髮啦，係靠係我身後，同埋大B細C嘅波路。

我忍唔住望一望佢環抱住我嘅雙手，我相信係旁人睇落，我哋猶如一對情侶。

所以話，台灣嗰個地方真係充滿奇蹟。

當初我買摩托車都係因為人咁平平地賣俾我，貪佢方便。點知依家，可以車到女仔。

不過到最後呢，係成功驗證咗我嗰句說話。

食完飯返嚟之後，Kiki就無再攞過我了。

坦白講啊，全程我都揸得唔係好專心，精神難以集中。

咁坦白講，Kiki算係中上樣嘅，身材雖然唔係特別好，但都OK，一路上都惹來唔少旁人嘅目光。

不過咁耐朋友，我對佢一路以嚟都無其他非分之想。

因為佢唔係我鐘意嗰類型，佢始終太港女，而我係鐘意得意type，而唔係女神feel。

我同佢出去求其食咗啲嘢，車佢返嚟嘅時候，佢好似已經習慣咗，無頭先咁緊張。

所以話，第一次嗰啲嘢，一閃即逝，多麼惹人回味？

尤其「第一次」對男人嚟講幾咁重要。

返到屋企之後，我繼續執嘢，咁Kiki呢？

繼續玩手機。

佢話佢今日唔想執，無動力啲。跟手係度hea，忽然間又話無心情，好sad，話想夜晚去飲酒。

女人變幻莫測得有點恐怖.....

咁我話「好啦，一陣晏啲陪你去啦」，但去到夜晚我就後悔了，因為呀叔我好撻边，好想瞓。

只不過我後尾真係見佢有啲sad味，幫佢鋪好床單，佢就攞足成日都手機，不停咁轉嚟轉去。

好彩嘅係，我學校附近就有間酒吧，唔洗再走去市區。

【4】談心

夜晚我哋決定去酒吧食嘢，飲下酒，嗌啲小食咁樣。

間酒吧我幾鐘意，幽清嘅感覺，佈置得幾有外國風味，沙發、吧枱應有盡有，而且仲有室外，係一個好適合放鬆嘅地方。

我最鐘意就係同三五知己一齊係度飲下酒，傾下心事。飲酒我唔係咁好，偶爾小斟兩杯。

嗰種純粹嘅快樂比起買醉，舒服得多。

我照舊點咗杯cocktail，Kiki都係一樣，不過就一直係度望住部手機，我見佢唔係係度打字覆人，而係不停係度碌手機。

直至杯酒嚟，我哋都係一句聲都無出過，尷尬？咁樣形容又唔係好貼切，因為佢根本無當我存在過。

Kiki好似自己一個嚟飲悶酒，而我只係嚟搭枱。

「喂！」我忍到自己嘅極限，終於要出聲了。

「你可以講你發生咩事未呢？你成晚係度搵手機，我都一樣係唔會知你發生咩事，都一樣唔會幫到你㗎。」

「我知你係失戀先過嚟台灣散心，我都知唔少人會揀台灣散心，因為過嚟又平又快，又有嚟玩，至少你散心唔會話想返大陸散心囉。」

「過到嚟你係可以hea，但唔好咁樣唔開心，你只會浪費緊你過嚟嘅時間，我覺得好唔抵姐。」

好彩Kiki都聽得入耳，就算佢擺出心不甘情不願嘅表情都無所謂，最緊要開心返姐。

Kiki終於熄咗個screen，放低部手機，伴隨住一聲嘆氣：「唉。」

「咩事啊？」我關心地問道。

「佢有新女朋友啦。」Kiki無奈地說。

我嘗試估Kiki咩心情，因為Kiki仲未放低，而佢個ex就一早放低咗，仲有新歡添。

係嗰個新世代，誰人給誰綠帽，分手後開始一段新關係，係多麼平常不過嘅事，多到每日都發生緊，我哋早已習以為常，見怪不怪。

係我哋上一輩嘅年代，拍好多年拖先係正常不過嘅事。依家拍好多年拖，係一件稀有嘅事。

「跟住呢？」我選擇聽曬Kiki係咩心情先。

「只不過過咗一個星期多啲，咁快就有新歡，仲話咩係我哋問題，性格唔啱，所以分手！」Kiki越講

越是激動，拎起杯酒一嘢灌落去。

本來輕鬆傾心事嘅氣氛，變到係佢想劈酒。

佢再叫多瓶啤酒，飲地道嘅台啤。

「依家真係越諗越激氣！咩都講到好冠冕堂皇咁，跟住呢？仲同我講話，我同條女無嘢嘍，只不過係朋友嚟，最尾咪又係搞埋一齊！」

「咩都係大話！」嗰杯細細標嘅cocktail話咁快就俾佢飲曬，再戰台灣啤酒。

「斃就斃在你相信佢呢.....」我淡淡地講出事實。

就算佢講大話，你唔信，佢一樣無成功到，無你乎。Kiki之所以會相信，源自於佢仲鐘意，繼而選擇相信佢。

愛嘅種感情，一但陷入，就好難抽離，好似沼澤一樣。

「點解佢可以咁快忘記，一年幾嘅感情，話唔記得就唔記得，仲可以咁開心咁快樂，點解啊？」語畢，再灌多一杯。

哇，佢都算幾飲得，咁都無事，俾我就唔得啦，自問真係唔識飲酒。

「唉，長情點都係痛苦嗰個。你諗下你之前同其他人講分手，話唔定嗰啲的仔嘅心情同你依家係一模一樣。」

「自己種嘅情根，依家食返個果，咪當係還囉。」

我知佢其實係想我安慰佢，但通常啲啲安慰有咩用姐？打完一針之後，當下係好返啊，但你係咪可以確保佢之後都唔會再病？

我都唔知打咗幾多針啦.....

「其實我不嬲都話，感情啲樣嘅唔想可以亂咁玩，依家覺得以前嘅自己做得好錯啊呢？」我盯實Kiki，Kiki連直視我都唔敢。

我知佢以前太多嘢啦，佢會殺我滅口都唔出奇，以前嘅佢都傷害過唔少人，估唔到今次食返惡果。

上得山多終遇虎，今次遇到個比佢更好識玩弄感情嘅人。總有一天，你會情不自禁咁折服係另一個人手中。Kiki如是，佢個ex都一樣。

「咩都可以玩，唯獨感情唔可以玩，因為代價太大啦，玩唔起。」

一講起啲句，我亦都諗返起以前啲嘢，因為我以前都俾人玩過，一顆真心俾人搓圓揸扁，嗰種痛苦我都唔想再經歷多一次。

「咁我應該點做.....我依家真係好痛.....好痛苦。」就算Kiki唔講，我都睇得出嘅。

「你嚟喱度就唔好諗起佢，亦都唔輪到你掛住，人哋有新女朋友，你掛住人哋，人哋就嚟搵你？佢身邊嘅人唔係你。」

我一怒之下，搶埋佢杯啤酒嚟飲。

我嬲，唔係因為以前俾人玩，而係俾同一個人玩兩次。

直至依家，班朋友係我面前提起Sandy，我都會諗返起，自己當初係幾咁傻西瓜。

但我唔會因為咁樣就去玩返人，咁樣做真係好小學雞，人哋打你一下，就要打返人一下。

因為我曾經痛苦過，所以我都唔想其他人受到我同樣嘅苦。

Kiki頭先有問佢應該點做，講出嚟好簡單，而且Kiki都知應該點做㗎，但做唔做到係另一回事姐。

好簡單，但做就唔係咁易。

放手囉，只要你放得到，喱種痛苦就唔會再纏繞住你。

關於佢嘅任何事，who fucking care?

問題係，唔係話你想放就放，自己呢自己話放到，但其實心入面仲係掛住佢，唔捨得佢，咁有咩用姐？

放手需要時間，更何況Kiki係被分手嗰一方，一時三刻無事就奇啦，除非佢無認真愛過姐。

「放手啦，你嚟台灣就係為咗忘記佢姐？喱段時間就俾自己去散下心啦。」

「我都好想忘記佢，但點解佢可以忘記得咁快？」Kiki好似進入咗一個好神聖嘅mode，完全無事我所講嘅嘢，只係想將佢心入面想講嘅、不滿講出嚟。

「明明我哋之前仲咁甜蜜，佢真係好迷人㗎，我真係好想佢留係我身邊……」

我等，等佢講完先。幾乎次次佢打嚟吐苦水嘅時候，都係佢有佢講，我有我講，有時真係覺得好無意義，但又唔忍心見到佢自己傷心呢。

自己係咪真係太好了人呢？唉……孽緣啊。

「你話啦，佢係咪真係好衰啊？留底我一個人。」

「係係係，佢係大仆街，你唔係。」我笑笑地說。

「係囉！我都係咁話。」好彩Kiki聽唔出我最尾嗰句意思姐，佢無非都係想我咁講姐，頭先嗰一下笑，充斥唔少無奈啊大佬。

然後，佢就自己係度飲悶酒。我等遲下先再同講啦，依家我講咩佢都聽唔入耳嘅。

就好似以前嘅我。每每遇到啲事情，就會感嘆：問世間情是何物。

大家遇到嘅愛情都八九不離十，好多道理你都好明白，但當你真係身在其中，啲道理都係無撚用。

明知係伏，你都係唔知痴咗邊條根要走去中下先安落。

【5】談心II

「點解啊？」喱句說話係我今晚聽得最多嘅一句說話。

「我記得張小嫻一本書講過，容易忘記嘅人係幸福嘅，記性好嘅人反而痛苦。」詳情我唔記得係咩書啦，但我對喱句特別印象深刻。

「因為我哋念舊，成日懷憫過去，唔捨得走出嚟，一直放係心入面。但人哋？早已將當初嘅事放低、忘記了，去開展下一段感情，而我哋仲傻傻企係原地。」

我講完之後，我望下Kiki，佢已經係一個醉醉地嘅款。左右搖下搖，同一個啱啱醒嘅人無兩樣。

很好！真係屌你個老母，講完等於無講過一撚樣。好明顯條友仔都無聽到我講乜嘢啦，真係俾佢搞到少少燥。

最後咪又係見到佢個sad樣嬲唔落，高form到依家，大大話話都識咗5年幾，我都係第一次見佢咁嘅樣，無可否認佢今次真係用情好深。

我見佢開始唔得啦，但仲死都話要飲，後尾就拉佢返屋企。

Kiki係酒吧出嚟之後好返啲嘅，唔知係咪因為俾風吹兩吹，佢成個人有返精神。

「做咩啊？做咩出...出...出咗嚟啊...啊？」Kiki死唔斷氣，「返...返去繼續飲啦！」

「走啦！仲返咩去啊？」我都係第一次拖住個醉漢返去，仲要係女仔，當中少不免會抽水啦，但今次好似無朝早坐摩托車咁激。

「唔返啊！我要繼續飲！」一般醉酒佬會做嘅嘢，佢都差唔多做齊啦，除咗嘔。

「好好好，返去我度再飲好無！？」我一氹二帶，拖住佢返去。

咁佢最尾都俾我勸掂，但奇怪嘅係，我以為佢已經醉到傻，但去到屋企樓下嘅時候，就清醒返，雖然講嘢仲係鳩下鳩下，但係又有文有路。

「返到去我要沖涼先啊。」佢好似無事咁喎又，我摸唔透。

竟然佢都講到咁，我咪由佢囉，係我印象中，女仔沖涼係麻煩啲嘢啦，我沖涼話咁快就出嚟啦，洗幾耐姐。

係Kiki沖涼期間，我照舊整理下間房，我不嬲都唔想我間動亂七八糟咁。

「得啦，到你沖啦。」Kiki沖完涼出嚟，我忍唔住去望佢一眼。

喱一望真係不得了。Kiki著住一件緊身小背心同埋小短褲，平時著得寬鬆嘅佢，遮住曬佢迷人嘅身材。

佢髮尾仲滴緊水，頸上攞住一條粉色嘅毛巾，一邊用毛巾擦緊啲水，一邊行緊過嚟。

『唔好望，唔好望。』我係心入面同自己講，努力克制住自己。

但我身為一個血氣方剛嘅男人，有乜可能唔望？就算你依家唔望，之後啲時間呢？

你以為只有一日嗎？你係要忍幾個月啊，如果真係如Kiki所講。

Kiki第一時間就坐係床到，撚起佢嘅二郎腿，跟住係度搵手機。

個性感嘅姿勢，十分之誘人，我敢講，無人一個男人係對一個如此誘人嘅女人無動於衷，話無諗歪嘅話肯定係呃你。只不過我哋同禽獸有別，係唔做姐，但唔代表唔會諗。

我唔得啦！我快快手執幾件衫入去沖涼冷靜下。

入去沖涼真係有效果，原本有反應嘅我，入到去都無曬。

沖完涼出嚟，開啟返個聖人mode，Kiki趴係張床度，背對住我，小腿朝天上擺，圓潤嘅屎忽，所有嘢一覽無遺。

開完之後咪又係做返凡人。

又要扮啦屌，真係好辛苦。嗰種辛苦係佢嚟之前，我完全無想像過，我以為大家都係朋友無乜嘢，但你始終係一個正正常常嘅男人。

所以點解其他人會唔放心自己另一半同異性去旅行，真係好易出事。最好嘅解決方法，就係避免啲啲嘢。

當我拎好曬床鋪，諗住今晚打地鋪做廳長啦，點知Kiki講：「你馴地下啊？」

我話：「係啊，你馴床得啦。」

「洗乜啊，你張床咁大，一齊馴咪得囉。」Kiki絲毫不介意，但其實我好介意啊大佬.....

我唔係驚你啊，我係驚我自己。

我間房幾大嘅，雖然啲嘢全部都係單人設施，但唯獨張床係雙人床嚟。

「唔係咁好嘅.....」我輕輕地婉拒。

「你又無女朋友，我又無男朋友，加上我相信你嘅。」Kiki加上一個天真活潑嘅笑容，個顆純真嘅心直直插入我心。

「我唔忍心見住我fd馴地下，同埋係我過嚟玩，有咩可能要主人馴廳？」

此時此刻，Kiki港女嘅形象全部化為烏有，嚟到台灣之後發現佢令人感到可愛嘅一面。

我不禁為我今朝鬧佢嘅說話而感到內疚，真係鬧錯佢啊！簡直係天使。

「咁好啦，你都講到咁囉，你今晚唔好搶我被就得啦。」講下笑化解下啲尷尬先。

過咗無耐，我哋等埋個頭乾，跟住就熄燈瞓。

我哋互相講咗句早抖之後，就墮入了黑暗。咁Kiki就瞓入面，而我就瞓出面，我張床係靠係牆邊嘅。

第一次同女仔同床共枕，雖然大家都知唔會有啲咩，但總係有莫名嘅緊張感。

我連大氣都唔敢抖啖，仲好清楚咁聽到自己心跳添。你話啦，你叫我點瞓得著先得㗎？

我本來係背對住佢瞓嘅，但係嗰個漆黑嘅環境中，時間過得異常漫長，你會慢慢感受到時間一滴一滴流走嘅感覺。

我忍唔住，擰轉身。卻俾我發現Kiki仲係度攞緊手機，因為佢都一樣背住我，但手機屏幕嘅光照咗落牆度，唔難發現。

「仲唔瞓？」我多口關心下。

「你都係啊。」我聽佢聲線，感覺好似有啲沉重。

「做咩事啊？」直覺話我知，好似有啲嘢唔妥。

我坐起身睇佢發生咩事啦，跟住我就望到啦，條友仔係度睇返以前啲相。

知道咗之後，我秒速瞓返低。

「仲以為你飲完酒會好想瞓，點知仲係度睇以前啲相。」我嘆了一聲大大嘅氣。

「其實.....你講嘅，我都知啊，但我個心仲好掛住佢。」咔嚓一聲，係熄屏幕嘅聲音。

「身在其中係難抽離㗎啦，但我知道你之後再回望返依家嘅自己，一定覺得自己好蠢。」

漆黑一片嘅晚上，係容易令人胡思亂想，一啲負面情緒沿住床邊一路爬，爬入你心靈。

「逼自己唔好諗，瞓醒又係一條好漢。」我理智咁同Kiki講。

嗰啲失眠嘅日子我唔係未經歷過，如今諗返起，我都唔知自己點撚樣捱過去。

「我每晚就係咁，望住以前啲相，越係開心嘅相，我就越痛，每晚都係痛住瞓，起身第一時間就係睇佢啲嘢，我都唔知自己幾時會好，幾時會放低佢.....」

「放低佢唔洗時間，坦白講，你依家成日記住佢都無用，索性乾脆啲仲好啦，俾自己型返次啦。」

「唉，我都唔知點做好。明明以前好乾脆，話唔鐘意就唔鐘意，就算對方飛我，我都可以無咩事，全身而退。但依家？我都唔知點解做唔到。」

估唔到我哋係嗰個伸手唔見五指，只能夠透過一扇窗搵到些少光芒嘅房間入面，仲要一男一女馴係同一張床度，大家都係後生世仔，一樣都乾柴烈火，但咩事都無發生到。

將今日嗰件事隨便話俾一班男仔fd知，你一定俾人笑到傻，咩都無做過就咁過一晚，我已經可以想像到佢哋會笑你咩：無能、蠢鳩、係咪男人嚟㗎？

但老實講，嗰種心靈上嘅交合，我更加享受，大家都係俾個心出嚟，同自己啲fd做個啲嘢，我真係做唔出，過唔到自己個關。

一旦破壞咗，我哋就返唔到去以前嗰種純潔嘅關係，至少我唔會過嗰一條底線。

就算自己幾想都好，始終都做唔出，就算今日係Kiki做主動都係咁話，換著第二個男人，會二話不說，屌咗先講。但我.....我可能連扯都扯唔起。

「因為你之前無愛得咁深囉，嗰啲嘢唔輪到你話事㗎嘛，係咪？」我係度諗，我哋會唔會就咁傾天光？今日只係第一日咋喎，之後仲有好長時間喎。

「噏，你嚟到周圍去玩下，識下台仔，台仔player只係佔少數，好多個樣呢.....普普通通咁啦，但勝在夠專一、夠溫柔。」

「我係度生活兩年，個人意見啦，我識個啲都唔差嘅。」

「我同自己講，過埋今晚就唔諗啦，去到一個新地方，去識新嘅人，開展自己嘅新生活！」Kiki講到好理想，好紅日feel。

「你係先好啊，唔好講完聽晚又打回原形。」同個啲每日話要早睡早起嘅人一樣，大部分都係做唔到嘅fd嚟。

【6】 散心

講下講下，我哋就靜咗落嚟，無幾耐我都聽唔到咩聲，就瞓著咗。

第二朝我哋瞓到自然瞓，我醒咗都Kiki都仲未醒。我一起身望到Kiki，本來仲有睡意嘅我，擰轉身見到佢就成個人醒曬。

琴日嘅回憶都湧曬出嚟，成個人清醒曬。

不得不說，Kiki嘅睡姿真係好小朋友，攞住我放係床邊嘅喬巴公仔瞓，劈大個口得個隆，搞到我都忍唔住笑咗出嚟，霎時間覺得，如果Kiki做我女朋友都唔錯㗎？

你諗乜鬼啊？你心入面明明仲有可妮㗎，你真係呢！

我間房係無廚房，你朝早想食早餐啊，要自己唔係唔得嘅，要自己去買器材返嚟整囉。

所以直接落樓下買係最快。

我梳洗好之後，就落街買早餐，以我對Kiki嘅了解，佢同我都差唔多係垃圾口嚟，食唔慣啲咩高級嘢，買咗啲我認為佢鐘意食嘅嘢返去。

當我返到去嘅時候，Kiki已經起咗身。

「起咗身啦？」我仲以為佢會有排瞓添，琴晚佢實夜過我瞓。

「你出門口已經嘈醒咗我啦。」Kiki坐係張床度玩手機，真係手機不離身嘅人。

「買咗早餐俾你食啦，快啲落床食啦。」我將啲嘢食放係張Ikea枱仔度。

「咁好？」Kiki即刻好興奮咁沖落嚟，「哇，係台灣早餐啊！」

見到佢好似小朋友咁，我都開心嘅。

「你買咗啲咩俾我啊？」小瑤雀躍咁係咁攞嚟睇。

「噏！嗰袋啊。」我指一指俾Kiki睇。

佢打開完之後，就開始港女啦，「下？我都唔食蛋，又唔飲豆漿.....」一臉嫌棄嘅表情。

「你真係呢，港女嚟㗎你。」啊，買埋俾佢仲嫌三嫌四，真係呢！

「唉我同你換啦，你食我嗰份。」

「你嗰份咩嚟㗎？」佢完全無視咗我話佢嘅嘢，淨係掛住食。

「哇！有小籠包㗎，我最鐘意食㗎啦！」真係挑剔.....

「係啊，好似你個波咁囉。」我一時口快快.....

「屌你啦！」Kiki好大力咁一嘢拍落嚟，「我以碼有B囉！」

其實我都知，都係串下姐.....琴日揸車都feel到嘅。

「係食就食快啲啦，一陣約咗個台灣朋友帶你出去玩。」我催促Kiki。

「下？你唔同我講嘅？」Kiki喺咁開隻筷子，諗住開餐，點知俾我喱句搞到呆咗係度。

「叫個fd嚟帶你去散心仲想點啊？我fd好好人㗎，你唔好蝦人添啊。」我先小人後君子咁講。

「你早啲同我講等我有啲心理準備啊嘛！加上我依家又未化妝未襯好衫！佢幾時嚟啊？」原來佢係擔心自己個樣.....

咁又係嘅，第一印象咁緊要，尤其是佢依家失戀緊，任何男性對佢嚟講，都可能係下一春。

「無咁快你放心啦，我約佢晏啲去食個早午餐，所以喱個早餐食少少就好，係俾你試下台式早餐咁咋。」

「快！依家已經9點啦！」佢用行動嚟話俾我知咩叫快。」

跟住佢就全程開始整理緊佢自己，我坐係張床度食花生打機。你知男仔㗎啦，出個街洗幾耐姐，但女人唔一樣，出街好似打仗咁。

佢先係吹頭整理咗個頭髮先啦，跟住又要電下頭，我唔知佢個噏邊得嚟咁多位，仲要裝埋啲衫啊化妝品，成個百寶袋咁。

接住落嚟，就係重頭戲啦，喱個變身嘅過程都有幸俾我見到。Kiki執好曬佢頭先食早餐張枱，將啲化妝品放曬上嚟。

上面啲顏色，你無返咁上下功力，你根本分唔清。

等佢襯埋衫最後再加工一下，前前後後大約個半鐘至兩個鐘左右啦。

犀利犀利！我都唔知打咗幾多鋪機，夠我爬一個排位了。

我哋出發去餐廳個邊，我個fd都去緊啦。

我哋都係揸直路，由台灣大道一路揸落去，我後面個個已經坐到無曬感覺咁，仲好自然咁玩緊手機，錄緊ig story。

「WOW!!!!!!」揸揸下車，Kiki係我後面鳩叫。

「你嚇鬼死我咩，揸緊車㗎嘛。」

「無啊，啲電影都係咁樣嗌啲啦坐電單車。」

「係啊係啊，咁你係咪上親郵輪都要講you jump I jump啊？」唔知咩邏輯嚟，好新鮮。

「你理得我啊！」我原以為佢咁樣會收手唔叫，點知仲繼續嚟，一邊鳩叫一邊拍片。

我哋去到嘅時候，我朋友已經到咗。

「嗨，你很早到喔？」我用熟練嘅台式普通話同我朋友講嘢。

基本上台灣嘅普通話係無捲脷音，所以講嘢輕快好多，間中夾雜下啲台語咁樣，就好似我哋講廣東話都要夾雜啲英文一樣。

「沒有啦，剛來沒多久。」傑克好客氣咁講。

「啊，這是我朋友，Kiki。」果然Kiki今日悉心打扮係有用㗎，Kiki打扮完係真係女神咁款嘅，我觀察到傑克望佢嘅眼神係不一樣。

男人係比女人更為膚淺嘅物種嚟。

「李好，我事Kiki。」Kiki佢今日無琴日咁膽小怕事，驚驚青青咁講普通話。

但咁就出曬事。

佢唔知拿來嘅自信，諗都唔諗就講出嚟，仲要講到一臉自信咁，不禁令我諗起古天樂講嘅普通話，加上謝霆鋒嘅自信。

「喂……」我想細細聲提下佢，但已經嚟唔切了。

「你好，我是傑克。」傑克佢笑笑口咁回應返佢，相互握個手。

反而我好似個局外人咁企咗係度，搞咩啊大佬……？

傑克用一個男人先會明白嘅眼神望一望我，同樣係男人嘅我，唔難明白佢嘅意思。

傑克：這妞很可以喔！

雖然佢成個人望落去係比較咸濕，佢亦都唔介意將啲真性情表露出嚟，但我知道佢係唔做啲咁咸濕嘢。總好過啲男仔，睇落正正經經，但其實內裏收埋一隻淫獸。

「這個餐廳很不錯的，很多網美也會來喔。」傑克介紹著這家餐廳。

環觀啲間餐廳，係好有feel，啲類型嘅餐廳台灣都好多，好文青風格。

淡黃色的燈光，配上一些古老的擺設，係擺設嘅中間，會擺放一啲綠色植物係度，望落更加自然。

我第一次去啲類型嘅餐廳嘅時候，我以為佢好貴啦，裝潢咁別緻，點知一打開菜單，只不過百幾兩百

台幣，你除返開都係四五十港幣。

你依家去茶餐廳食都差唔多嘅價啦，但嘅度更加有feel，服務更加好，嘢食亦好食。

不過食得多，都係會想食返香港本土嘢。

「哇！好平啲。」Kiki驚訝地說，佢嘅反應係我意料之內啦。

「啊，我事講很平宜。」Kiki笑笑地同傑克講。

唔知點解，我心入面有陣酸酸嘅味道。

嗰種酸唔係對Kiki有非份之想嘅酸，而係佢哋兩個都係我好朋友，依家佢哋fd到我應該開心先係，但好幾次嘅無視同埋只係在意對方，而冷落咗我。

搞到我心酸酸，不是味兒。

「對啊，這邊我覺得滿划算的。」傑克個死仔，明明同我就唔係咁正經，係靚女加上新認識就扮曬正經咁！

「對了，你打算在這邊玩多久？」

「三個月吧。」

男人係認真嘅時候最有魅力，女人呢？我覺得係對佢有意思嘅男人面前，先最有魅力。

「哇，好久喔！」

「她是來散心的啦。」我幫Kiki解答。

「怎麼了嗎？」傑克關心地问道。

「我唔識點講，你講啦。」Kiki一臉尷尬，條友終於頂唔順啦？唔係好有自信嘅咩？

我擺出個勝利嘅笑容，得得戚戚咁望住佢。

「沒有啦，她就被戴綠帽，一氣之下就來了。」我幫Kiki解釋，成為佢嘅代言人。

「下？這麼正也會被綠帽嗎？不會吧？」傑克有啲唔係好信，瞄了我一眼，再瞄一瞄Kiki，眼神盡是懷疑。

我哋點下頭，以示無呢佢。

「好啦！你們有事盡管找我吧，可以幫的一定幫！之後有空就帶你們四處走走。」

「我到現在還沒忘記他。」Kiki認真咁講，就算佢唔講，啲嘢事我都知。

「慢慢來吧，忘記一個人不是容易的事，沒經歷的，不算完整的人生，對吧？」傑克笑說，喱啲就係男人。

沈重嘅心情，只會放係心底，偶爾先會由心入面鑽少少出嚟。

「對了于安，我聽姿欣說，可妮找一份飲料店的工作欸，在我們學校附近。」

【7】散心II

「真的假的？」可妮係我係台灣鐘意上嘅一個女仔，我想追佢㗎，但佢實在太難追.....

點解？因為佢太過於獨立。嗰個評價唔單單係我，其他人都係咁認為。

基本上，可妮生活係唔需要男人，咩事都自己搞得掂，我有時見佢辛苦，想幫輕下佢，卻經常俾佢拒絕，話自己可以解決得到，做咩要靠人㗎？

唉，連做朋友，親近都覺得難，更何況要一齊？

「真的啦，騙你幹嘛。」

「那她在哪裡做？我偶爾可以去看她一下。」我認真。

「誰是可妮？」Kiki搭唔上話，跟住八卦一下。

「你不知道嗎？」傑克有啲奇怪，以為我哋咁好朋友，竟然會唔知。

「Kiki她還不知道啦，香港那邊的朋友都不太知道我的感情事啦。」我不嬲都會將兩邊嘅嘢分返開，咁樣無咁煩。

「可妮就是于安喜歡的女生啦。」傑克臉帶笑意。

「哦，就是她喔？」Kiki個八卦樣，做到出曬面。

「對啊，你知道？」

「無啦，只事有講過DD啦。」

我笑咗出嚟，佢講普通話真係好好笑。

「你想知道的話，我可以講給你聽喔～」傑克調皮咁講。

「喂！」我知道佢都係講下笑，循例上都要扮下嘢嘅。

「哈哈！開玩笑啦，怎麼了？不能講喔？」

係我哋閒聊嘅時候，我哋嘅餐點亦啱啱好上嚟。

「你們的餐點都到齊囉。」服務生好有禮貌咁講，個心聽落都舒服好多。

而且大部分都好有禮貌，唔似得香港周不時都西口西面嘅。

「無餐具嘅？」Kiki一臉奇怪咁講。

「啊，台灣啲餐具係要出去自己拎㗎。」正當我解釋嘅時候，我期望緊Kiki係會出去幫手拎下，因為

佢係坐最近餐具嗰邊嘅，由佢去拎係最為方面。

但Kiki不為所動。

「做咩啊？你哋唔係去拎咩？」琴日先覺得佢無咁港女，依家又犯病啦。

「我去拿吧。」傑克睇得出咩事，自己主動話去拎。搞到我勁唔好意思，唔知點好。

喱一點要記落嚟，遲下同佢講，喱啲咁港女嘅行動真係想佢改曬佢！

除咗拎餐具要我哋拎，就連埋單都一樣係咁理所當然。

最後係我俾埋Kiki嗰份，我廢事要傑克難做人。

本來中學嗰陣Kiki都無咁過份，係到近喱一年，我半年左右返一次去，佢都已經係咁，等我去埋單。

我嗰陣未意識到咁嚴重，心諗一餐半餐無咩所謂啦，但依家好似唔係咁了。

你最後問返佢拎錢又唔係，唔問佢拎又唔係咁，唉...

傑克臉上露出尷尬嘅表情，但喱個表情無係佢臉上停留好耐，一陣間就無咗。

然後佢就自動自覺拎錢出嚟，然後客氣咁同我哋講：「你們難得來到，這一頓就我請吧！」

「那.....怎麼好意思？」我偷瞄Kiki一眼，見佢無任何動靜，成件事好理所當然咁。

我到依家都唔明點解會有喱種心態出現，成個腦都係問號。

如果你係覺得男仔出街係理所當然咁要俾錢，咁女仔係咪都要理所當然咁俾男仔屌？

咁唔係㗎嘛.....

「沒關係啦，我偶爾請一下有什麼所謂。」

「謝謝啦。」Kiki有禮貌咁講。

傑克埋完單之後，佢話有事要走先，咁喱樣唔係因為怕咗Kiki先話要走，而係佢本身真係有事，一早同我講咗㗎啦。

我哋互相道別之後，我就諗住帶Kiki去麗寶樂園玩下。

「一陣去邊啊？」Kiki好似咩事都無，仲好開心咁同我傾偈。

但我真係忍唔到，我決定點都要同佢講一次，我唔想佢再繼續咁落去。

你話我八婆又好，多管閒事都好，我只不過想為佢好，喱種價值觀真係唔好。

「麗寶。」我冷冷地道。

「咩嚟㗎？玩咩㗎？」依家又成個細路女咁，但此刻我只係更覺得佢港女。

「……」我無理到Kiki，肚入面有氣，我要Kiki知我嬲。

因為做朋友咁耐以嚟，我都未試過嬲佢。

應該係話，我好少會對朋友發嬲，雖然唔係啲咩大毒撚，係毒撚界我資歷尚淺，但我平時都毒係屋企，同普通毒撚一樣，打機，得閒睇下AV打下飛機。

所以Kiki見到我唔出聲，嬲爆爆咁款，佢都嚇親。

我哋等緊直通巴士去麗寶樂園嘅期間，都有成十幾分鐘時間，過程中我一句嘢都無同Kiki講過。

直到上咗車，Kiki先戰戰兢兢咁問我。

「你……無咩事啊嘛？唔開心？」

我好撚霸氣咁無理佢，做男人，一定要硬！

企硬！

「你……嬲我啊？」Kiki小心翼翼地問。

我無答到佢。

「咩事啊，你講啦。」急性子嘅佢，終究係忍唔住嗰種冷空氣。

「你啊，唔可以再成日咁理所當然咁要男仔幫你做嗰樣做嗰樣，更加唔可以理所當然咁要男仔幫你埋單。」我見佢咁有誠意，就同佢講。

「哦，你就係咁樣就嬲？乜你咁小氣㗎。」哇，估唔到我俾佢話返轉頭。

「小氣？我都係為你好咋。」

「男仔不嬲都係咁㗎，同親我出街嘅男仔都會主動幫我埋單，唔係我講㗎。你睇下啦，頭先都係傑克主動話要埋單嘅。」Kiki唔單止理所當然啊，講都講得理直氣壯。

哇，一時之間我都真係唔知點反駁佢。

我平心靜氣冷靜咗幾秒之後，「Kiki，其實頭先傑克係好唔情願㗎你知唔知？」

「有咩？我見佢笑得好開心㗎。」Kiki仲笑笑口咁。

「係咩？唔通人哋發你脾氣落你面？」Kiki佢對朋友好無錯，但係異性面前，就係一名港女。

有啲人啱做朋友，但唔啱做情侶。

「咁啲，咁人啲都慣啦.....」佢發現駁唔贏我，然後又出女人嘅絕招。

扮可憐。

大多數男人都會受啲招嘅，建基於佢對你有意思，覺得你應該受到人憐愛。

但唔好意思，依家老奉咁款，我覺得唔需要啲咁憐愛。

就算上連登開post，問全能嘅連登仔，佢一樣都係會俾人狠狠地屌。

「我係想你唔好再咁樣落去，你頭先咁樣好容易嚇走啲好男仔㗎。」我見佢態度軟化落嚟，我都無謂再得寸進尺，得饒人處且饒人。

「咁人啲請係人啲紳士啲，我接受都正常姐。」

「我同你講，無一個男人會拒絕一個女人食完飯後俾返錢佢。」

「佢最後收唔收係另一回事，但你係男人嘅心目中已經加咗分，覺得你係一個賢慧嘅女仔，唔港女。」

「認真啊，你咁大個女，真係無俾人話過你港女？」

Kiki思考良久，先吞吞吐吐咁擠出一個「有」字。

「咁咪係囉，你自己都知啦，但又無反省過。」我不留情面。

「咁唔係點姐，我又唔知點做，你就淨係識屌我.....屌囉屌囉，咁鐘意屌我，俾你屌啦！」

Kiki激動得制，搞到大聲得制，搞到嚇親車上面啲乘客，然後搞到佢哋望住我哋兩個。

好彩嘅度唔係香港，聽唔明廣東話，如果唔係聽到頭先嘅對話應該會報警。

「唔好嬲唔好嬲，我點會屌你啊？」調返轉我叫Kiki唔好嬲都有嘅？

「所以你放心啦，你嚟台灣，我會徹底剷除你身上嘅所以港女格。」我拍曬心口保證。

「但有時真係習慣咗啊嘛.....」

「知啦，鬼叫你靚女咩？咩都俾人寵慣囉。」

「咁.....你係咪唔嬲我啦？」算Kiki有良心啦，仲識得關心我。

「我嬲你都係因為你個個行為實在唔好，搵個方法令你聽得入耳姐。」

「啊.....你！」Kiki大力扭我手臂，「好啊！玩我啊嘛？」

「痛痛痛.....」睇Kiki身型纖瘦，但用起暴力上嚟，唔輸俾啲黑警。

「邊有啊，係同你去玩啊。」我投降。

「總之呢，你聽得入耳就得啦！」

我哋嚟到麗寶outlet，嗰度有個好大嘅商場，隔離就係遊樂園，入面有玩水嘅設施。

「點啊？你去唔去樂園玩？」我一落車就問Kiki。

「麻麻地咋喎，我想影下相行下街咁啦。」

我指一指出面，係條馬路面，一堆人係度影緊相。嗰度就係打卡聖地，基本上嗰度影相係最靚。

「嗰邊係影咩？」

我直接開ig俾佢睇相，類似係嗰個角度嘅相，Kiki一睇完之後，就捉住我手臂。

「行行行！如果唔係唔知要等幾耐啊！」女人為咗影相可以去到幾盡？

就算Kiki戒得到第一樣港女格，佢仲有其他港女格要改。

算啦算啦，話完佢之後，我都已經曬咗唔少腦力。

就下佢一次咁多，係度排住隊影相，係排隊嘅同時，我都有就下角度，睇下後面影唔影到。

麗寶出面係有好多彩虹色嘅建築，跟住上面有一個架係頂樓嘅摩天輪，係真係幾靚嘅。

「好啦。」我影到Kiki女神級咁。

「哇！唔掂喎。」Kiki一臉嫌棄。

「咩唔掂啊？咪影到你隻腳掂到底線，42寸長腿咁囉，咁仲唔掂？」我心很累啊。

「你睇下我個樣，我個樣都扭曲曬，都未準備好！」

係其他人眼中，應該都會以為我係Kiki男朋友，仲要係好廢嘅港男，俾Kiki咁樣插法，下下到肉。

「好，我再影多次啦。」慢慢試下試下，就到我哋企係最前影，亦係一個最好嘅角度。

由Kiki企好位之後，我就狂摵快門。

我影咗好多張相俾佢，「影咁多，實得啦？」我抱住嗰個想法去俾部手機佢，十足十中學生交作文咁，求其寫夠字數交出去嘅作品一樣。

「好啦好啦，得啱啦，廢事要後面啲人等。」咁佢又衰唔曬，識得顧下人感受。

其實港女最大嘅唔好嘅地方就係，唔理人感受。

所以，當港女開始理人感受嘅時候，就係佢哋脫離港女魔掌嘅時候。

「咁點啊？有無滿意㗎？」

「你影成二百幾張㗎，唔滿意都覺得你有誠意啦，係咪啊？」

「你仲要幫我影㗎！」Kiki指一指天上嘅摩天輪。

「唔撚係掛？」我覺得去坐摩天輪係好，但仲要影嘅話，我怕我會有審美疲勞。

「個摩天輪真係好靚啊，而且都好少有機會坐咁高嘅摩天輪。」Kiki一時港女一時細路，貪玩到乜咁。

「好！我都未坐過㗎一個，我上次係坐過高雄嘅摩天輪。」

跟Kiki就行入個商場度，一邊行一邊睇相。

Kiki隻眼都無望過我，淨係掛住望部手機。唉，算啦，都慣㗎啦。

我哋直接去搵摩天輪，係排隊嘅同時，對面全部都係成雙成對。

頂，睇到都覺得尷尬，再望一望後面排隊㗎人。

一撚樣.....

「不如走囉？」我唔知邊度嚟嘅膽量，夠薑叫期待已久嘅Kiki講啱句說話。

「走？點解啊？」Kiki放低手中嘅手機，正視我雙眼。

「你睇下啊，嗰度咁多人，咁多個都係情侶嚟㗎，我哋咁樣好尷尬㗎嘛。」

「邊個話朋友就唔坐得摩天輪㗎？」Kiki好是執著。

「唔係呢，嗰種感覺就好似情人節啊，聖誕節出街，出去都成雙成對咁，自己就隻身街出去。係無嘢，係無咩唔得㗎。人哋嘅世界咩都有，而自己咩都無姐，覺得自己慘姐。」

「咁你咪當住我係你女朋友，陪我坐一陣摩天輪囉。」

「咁係上面.....嘻嘻嘻！」我開玩笑地說。

「食蕉啦你！死人咸濕仔。」

「陪我坐陣啦，想見下好風景啊，又係你話陪我嘅！」

「係啦，陪咪陪囉！」

上到摩天輪，都一樣見到前後車廂情侶一對對，而我眼前嘅Kiki呢，就拎住相機係咁影。

佢話想見下風景，其實唔係用「眼」睇，而係用「手機」睇姐。

正如我一開頭所講，po相並唔係想俾其他人睇，而係想俾一個人睇。

嗰個人，往往係令你感到傷心嘅嗰一個。